

Evening Dogri (NSD) Bulletin 21-07-2025

आकाशवाणी

खबरां ----

1. संसद दा बरसांती आहला इजलास अज्ज शुरू होई गेआ ऐ। पैहले रोज दौनें सदनं च डंड रौली दे चलदे कार्रवाई पैहले दपैहरी तगर ते मगरा कल्लै तगर स्थगित करी दिती गेई।
2. प्रधानमंत्री नरेंद्र मोदी होरें आखेआ ऐ जे आपरेशन सिंदूर भारत दी फौजी ताकत दे प्रदर्शन च महत्वपूर्ण संगेमील ऐ।
3. संसद दे सदस्ये अज्ज न्यायमूर्ति यशवंत वर्मा गी हटाने लेई लोकसभा अध्यक्ष ओम बिरला होरें गी इक ज्ञापन सोंपेआ ऐ।
4. संसद नै लदान पत्र विधेयक 2025 गी अज्ज पास करी दिता ऐ।
5. बंगलादेश वायुसेना दा इक सिखलाई आहला जहाज अज्ज ढाका च हादसे दा शिकार, 19 जनें दी मौत, 100 कोला मते जखमी।
6. काहिरा च आयोजित विश्व जूनियर चैंपियनशिप च 12 मिम्बरी भारती दल दी अगुवाई युवा खडारी अनाहत सिंह करडन।

<><><><><><>

सिविल हवाबाजी दे केंद्री मंत्री के. राम मोहन नायडू होरें आखेआ ऐ जे अहमदाबाद च होए दे ब्हाई जहाज हादसे दी जांच, इत्त सरबंधी जांच ब्यूरो आसेआ पूरी चाली पारदर्शी ढंगे कन्नै कीती जारदी ऐ। उनें आखेआ जे जांच प्रक्रिया पूरी चाल्ली अंतरराश्ट्रीय मानकें स्थाबै चलै करदी ऐ जेदे च अंतरराश्ट्री सतह दे माहिरें गी एहदी जिम्मेवारी दिती गेदी ऐ। अज्ज राज्यसभा च प्रश्नकाल दौरान जिमनी सोआलें दा परता दिंदे होई उनें एहू गल्ल आक्खी। उनें आखेआ जे उनें इस बारै लिखे दे केई लेख बी दिक्खे न जेदे ना छड़ा भारती मीडिया सगुआं पच्छमी मीडिया दे लेख बी शामिल न ते सारें च अपना-अपना नजरिया ते विचार पेश करने दी कोश्ट कीती गेदी ऐ।

<><><><><><>

PM-Monsoon-Session

संसद दे बरसांती आहले इजलास शा पैहले मीडिया गी संबोधित करदे होई प्रधानमंत्री नरेन्द्र मोदी होरें आपरेशन सिंदूर गी भारत दी फौजी ताकत च इक बड्डा संगे-मील करार दिता। उनें आखेआ जे एहू मिशन 100 फीसद कामयाब रेहा ते एहदे तैहत् साढे सुरक्षाबलें छडे 22एं मिटें दे अंदर गै आतंकवादी ठिकानें गी तबाहू करियै पूरी दुनिया गी भारत दी बधदी रक्षा समर्थ कन्नै वाकफ करोआई दिता। संसद दे इजलास गी, जित्त दा जश्न करार दिंदे होई श्री मोदी होरें संसद सदस्यें गी गुजारिश कीती जे ओहू भारतवासिएं ते रक्षा सरबंधी नमिएं काहडें गी बढावा देने लेई इक सुर च अपनी अवाज बुलंद करन। प्रधानमंत्री होरें पहलगाम आतंकवादी हमले पर दुक्ख बुज्जेआ ते इस मामले गी लेइयै सब्भनें सियासी पार्टिएं आसेआ दस्सी गेदी इकजुटता दी सराहना बी कीती।

<><><><><><>

Justice

संसद दे कई सदस्यें अज्ज न्यायमूर्ति यशवंत वर्मा गी हटाने लेई लोकसभा अध्यक्ष ओम बिरला होरें गी इक ज्ञापन सोंपेआ। कुल 145 सांसदें संविधान दी दफा 124, 217 ते 218 दे तैहत् न्यामूर्ति वर्मा

खलाफ महाभियोग प्रस्ताव पर दस्तखत कीते। बीजेपी, कांग्रेस, टीडीपी, जेडीयू, जनता दल एस, जन सेवा पार्टी, एजीपी, शिवसेना शिंदे ते सीपीएम सने बक्ख-बक्ख पार्टीएं दे सदस्यें एहदे पर दस्तखत कीते देन।

<><><><><><>

Rajyasabha-ladan Patter

संसद नै लदान पत्र विधेयक 2025 पारित करी दित्ता ऐ। राज्यसभा नै अज्ज इसी मंजूरी दित्ती। लोकसभा इस बरे मार्च च इसी पैहले गै पारित करी चुकी दी ऐ। एहदा मकसद पोत परिवहन दस्तावेजें आस्ते कनूनी ढांचे गी नमा ते सरल बनाना ऐ। एह लदान पत्र जारी करने आस्तै कनूनी ढांचा प्रदान करने आहले भारती लदान पत्र अधिनियम 1856 दी थाहर लैगा। लदान पत्र इक्क मालवाहक आसेआ वाक गी जारी कीते जाने आहला इक्क दस्तावेज हुंदा ऐ। एहदे च लेने आहले माल-समेयान दे प्रकार, मात्रा, स्थिति ते माल पजाने आहली जगह समेत सब्बै विवरण शामिल होंदे ना। राज्यसभा च विधेयक पर चर्चा दा उत्तर दिंदे होई केंदी पतन, पोत परिवहन ते जलमार्ग मंत्री सर्बानन्द सोनोवाल होरें आखेआ जे एहदे अंतर्गत सागरमाला कार्यक्रम शुरू कीता गेआ ते 805 थमां बद्द परियोजनाएं दी पंछान कीती गई। उनें गलाया जे हुन सब्बै प्रमुख बंदरगाह रेलवे ते शिडक मार्ग कन्नै बेहतर तरीके कन्नै जुड़ी गेन। बंदोगाहें दी क्षमता च वृद्धि पर लो पांदे होई श्री सोनोवाल होरें आखेआ जे 2013-14 च तटीय नोवहन क्षमता छड़ी 87 मिलियन मीट्रिक टन ही ते आधुनिकीकरण दे बाद एह क्षमता बढियै 165 मिलियन मीट्रिक होई गई ऐ। उनें आखेआ जे जलमार्गें दे सरबंध्यै च एह पैहले बस 18 मिलियन मीट्रिक टन ही जेड़ी हून बढियै 145 मिलियन मीट्रिक होई गई ऐ। उनें अगगे गलाया जे प्रधानमंत्री नरेंद्र मोदी होरें 2047 तगर भारत गी दुनिया दे शीर्ष 5 जहाज निर्माण देशें च शामिल करने दा लक्ष्य रक्खे दा ऐ।

<><><><><><>

Bangladesh-Crash

बांग्लादेश वायु सेना दा इक्क प्रशिक्षण विमान अज्ज दपैहरी ढाका दे उत्तरा च दुर्घटनाग्रस्त होई गेआ, जेदे च पायलेट समेत 19 जनें दी मौत होई गई। हादसे च 100 कोला मते लोकें दे घायल होने दी बी खबर ऐ। इंटर सर्विसेज पब्लिक रिलेशन्स मूजब F7 BGI ज्हाज दपैहरी 1 बज्जियै 6 मिनटें पर डोआरी भरदे गै हादसे दा शिकार होई गेआ। अग्निशमन सेवा नै इक्क व्यक्ति दी मौत दी पुष्टि कीती ऐ। अग्निशमन सेवा ते नागरिक सुरक्षा नियंत्रण कक्ष दे अधिकारी नै दस्सेआ ऐ जे उत्तरा माइलस्टोन कालेज दी ईमारत कन्नै जाई बज्जा। बांग्लादेश सरकार नै इस हादसे दे बाद इक दिनै दे सोग दी घोषणा कीती ऐ।

<><><><><><>

Kochi-India-Plane

एयर इंडिया दा कोच्चि थमां मुंबई आ'रदा विमान अज्ज मुंबई ब्हाई अड्डे पर तेज बरखा बश्कार लैंडिंग दरान रनवे थमां तलैटी गेआ। विमानन कंपनी एयर इंडिया नै इक्क बयान जारी करी घटना दी पुष्टि कीती। शुरूआती रिपोर्ट मूजब खराब मौसम करी विमान लैंडिंग दे तुरत बाद रनवे थमां तलैटेआ। सूत्रें दस्सेआ ऐ जे लैंडिंग दरान विमान च त्रै टैर फट्टी गे ते ज्हाज दा इंजन क्षतिग्रस्त होई गेआ होग। एहदे बाद ज्हाज टर्मिनल गेट तोड़ी पुज्जने च सफल रेआ जित्थे सब्बे जात्तरी ते चालक दल दे सदस्य सुरक्षित उतरी गे।

<><><><><><>

Mumbai-Dosh Sidhi

बम्बई उच्च न्यायालय नै अज्ज निर्णायक साक्ष्य दी कमी दा हवाला दिंदे होई 2006 च होए दे मुम्बई ट्रेन धमाके आहले मामले च 12 दोषियें गी बरी करी दित्ता ऐ। न्यायाधीश अनिल किलोर ते श्याम चांडक दी इक विशेष खंडपीठ नै 5 दोषियें गी मौत दी सजा ते 7 लोकें दे आजीवन कारावास समेत सब्बै दोष सिद्धियें गी रहू करी दित्ता। खंडपीठ नै आखेआ जे दोषियें खलाफ मामला साबित करने च

अभियोजन पक्ष पूरी चाल्ली विफल रेआ ऐ। अदालत नै निर्देश दित्ता ऐ जे होर मामलें च ओहू वांछित नेई ऐ तां आरोपियें गी बरी करी दित्ता जाग। 11 जुलाई 2006 गी होए दे मुम्बई ट्रेन धमाकें च 180 थमां बहू लोकें दी मौत होई गई ही ते सैकड़ां लोक घायल होए हे। एहू मुम्बई दा सब्भनें शा घातक आतंकी हमलें चा इक्क हा। एहू फैसला इस त्रासदी दे 19 बरें बाद आया ऐ।

<><><><><><>

Russia-Ukraine

रूस दे प्रवक्ता दिमित्री पेस्कोव होरें आखेआ ऐ जे रूस-यूक्रेन पर समझोते दी दिशा च तेजिया कन्नै अगड़े बधने गितै तैयार ऐ पर ओहूदा मुख मकसद अपने लक्ष्यें गी हासल करना ऐ। इक इंटरव्यू च उनें आखेआ जे राष्ट्रपति व्लादिमीर पुतिन होरें कई बारी यूक्रेन कन्नै समझौते गी तौले कुसै नतीजे पर पुजाने दी अपनी इच्छेआ जाहर कीती ऐ। रूस नै आखेआ ऐ जे जेकर कोई बी शांति समझौता यूक्रेन आसेआ 4 इलाकें थमां वापस सहने, नैटो च शामिल होने दी इच्छेआ छोड़ने ते नैटो सैनिकें दी तैनाती रोकने पर निर्भर करदा ऐ।

<><><><><><>

Israel-Attack

इस्राइली सेना नै यमन दे होदेइदाह बंदरगाह पर ठिकानें पर हमला कीता ऐ। इनें ठिकानें दा इस्तेमाल हौसी विद्रोही सैन्य उद्देश्यें आस्तै कीता जा'रदा हा। इस्राइल सेना दे प्रवक्ता नै सोशल मीडिया पोस्ट च आखेआ जे इस हमले दा लक्ष्य आतंकवादी हौसी शासन कन्नै सरबंधत बुनियादी ढांचा हा। इस बंदरगाह दा इस्तेमाल पैहले ईरान दे हौसियों तोड़ी युद्ध सामग्री पजाने आस्तै कीता जंदा हा। बा-चा एहूदा इस्तेमाल इस्राइल ते औहूदे सहयोगियें पर हमलें आस्तै कीता जंदा हा। इस्राइली सेना नै मध्य गाजा च दीर अल-बला पर जमीनी ते ब्हाई हमला कीता ऐ। एहू 21 महीने पैहले हमास कन्नै संघर्ष शुरू होने दे बाद शैहर च पैहला जमीनी अभियान ऐ।

<><><><><><>

ED-Arrest

प्रवर्तन निदेशालय नै बिल्डर खरीददारें कन्नै 1 ज्हार 100 करोड़ रपे दी धोखाधड़ी दे मामले च रामप्रस्थ समूह दे दो प्रमोटर्न गी धन शोधन वितरण अधिनियम तैहत गिरफ्तार कीता ऐ। निदेशालय नै दस्सेआ ऐ जे उन्नै इनें प्रमोटर्न गी दिल्ली ते गुरुग्राम च उन्दे त्रै ठकानें पर आवासीय ते बवसायिक परिसरें दी तपाशी लैती ऐ। निदेशालय मूजब रामप्रस्थ प्रमोटर्स एंड डेवलपर्स प्राइवेट लिमिटेड नै बक्ख-बक्ख परियोजनाएं आस्तै 2 ज्हार थमां बहू घर खरीददारें थमां करीब 1 ज्हार 100 करोड़ रपे वसूल कीते हे। मामले दी जांच जारी ऐ।

<><><><><><>

Squash

भारत दी युवा स्क्वाश खडारन अनाहत सिंह काहिरा च आयोजित विश्व जूनियर स्क्वाश चैंपियनशिप च 12 मिम्बरी भारती दल दी अगुवाई करै करदियां न। अज्जै थमां शुरू प्रतियोगिता 6 दिनें तगर चलग ते दुनिया दे 19एं बरें कोला हेठली उम्मी दे सिरे दे 234 खडारी एहदे च हिस्सा लै करदे न। अज्ज खेड्डे गेदे मैच च महिला सिंगल्स च अनिका दूबे नै अपना मकाबला जित्ती लैता ऐ।

<><><><><><>

Vietnam-Wifa

वियतनाम ते लाओ च आए दे वीफा तूफान दे बाद उत्थे मौलाधार बरखा ते तेज ब्ला चलने दी शैका जताई गेई ऐ। वियतनाम च इस तूफान दे असर बी घट्ट करने लेई एहतियाती गैई पुट्टियां जारदियां न। इस तूफान दे अज्ज चिरे रातीं वियतनाम दे समुंद्री कंडे कन्नै टकराने दी मेद ऐ। उत्थूं दे प्रधानमंत्री फाम मिन्ह चिन्ह होरें मकामी प्रशासन गी समुंद्री सफर पर रोक लाने, मच्छियां फगडने लेई नेई जाने, माल ढोआई आहले ते सैलानी ज्हाजें दी आओजाई रोकने दा निर्देश दित्ता ऐ। लाओ च मौसम

विभाग नै चानचक्क हाड औने ते ल्हास-पस्सियां पौने दी चेतावनी जारी कीती ऐ। झिगडे इलाकें ते दरयाएं दे कंडे रौहने आहले लोकें गी सौहगा सतर्क रौहने लेई आखेआ गेआ।

<><><><><><>

Mumbai-Orange Alert

मुम्बई दे एहदे आले-दोआले दे इलाकें च अज्ज बडुलै थमां गै रूकी-रूकिए तेज बरखा बराह करदी ऐ। मौसम विभाग नै पालघर गी छोडियै मुम्बई, नवी मुम्बई, ठाणे ते रायगढ सने कोंकण क्षेत्र लेई बी अगले 24एं घंटें गितै आरेंज अलर्ट जारी कीता ऐ। मैहकमे मूजब दक्खन पच्छमी मानसूनी ब्हाएं दे कारण शेहरा च भारी बरखा होआ करदी ऐ। ज्हाज कंपनिएं जात्तरा कोला पैहले जात्रिएं गी पैहले सवां योजना बनाने, दना पैहले घरा निकलने ते डोआरी दी स्थिति दी जांच करी लैने दी अपील कीती ऐ। आम लोकें गी बी घरै अंदर रौहने ते गैर जरूरी सफर करने कोला बचने दी सलाह दिती ऐ।

<><><><><><>

Landslide-Katra Poonch

श्री माता वैष्णो देवी आहले रस्ते पर होई दी लगातार बरखा करी ल्हास-पस्सियां पौने दी घटना पेश आई। इस घटना करी 9 श्रद्धालु घायल होए ना। सारे घायलें गी इलाज आस्तै नारायणा अस्पताल कटडा च लैता गेआ ऐ। इस घटना च घायल इक व्यक्ति दी मौत होई गेई। इस घटना मगरा जात्तरा पराने रस्ते राएं अजें बंद ऐ पर ताराकोट आहले रस्ते राएं जारी ऐ। मलबे गी रस्ते थवां हटाने दा कम्म जारी ऐ। तोआई, पुंछ जिले दी हवेली तहसील च इक प्राइमरी स्कूल ल्हास-पस्सिएं दी चपेट च आई गेआ जेदे चलदे इक विद्यार्थी दी मौत होई गेई ते इक अध्यापक ते 4 होर बच्चे जखमी होई गए। घायल बच्चें गी फौरी तौरा पर इलाज लेई राजा सुखदेव सिंह जिला अस्पताल लैता गेआ। उपराज्यपाल मनोज सिन्हा ते मुख्मन्त्री उमर अब्दुल्ला होरें इनें घटनाएं च 2 कीमत जानें दे नुकसान पर दुख ते बसोस जाहिर कीता ऐ।

<><><><><><>

Search-Op. Kishtwar

सुरक्षाबलें किश्तवाड़ जिले दे घने जंगली इलाके च छप्पे दे आतंकवादियें दे इक समूह दी धरपकड़ आस्तै तपाशी अभियान अज्ज परतियै शुरू कीता। जि'आं जे पैहले बी खबर दिती गेदी ऐ जे कल संज्ञा डच्चन ते नागसेनी बश्कार दे इलाकें च आतंकवादियें दी नक्लोहरकत बारै सूह थ्होने परैंत पुलस ते फौज नै इलाके गी घेरियै तुपाई अभियान शुरू कीता जिस दरान जंगलै च छप्पे दे आतंकवादियें गोलियां चलाइयां जेदा सुरक्षाबलें बी परता दिता ते दो तरफा गोलीबारी किश गै चिरें तोड़ी जारी रेही। मन्नेआ जा'रदा ऐ जे एहू आतंकवादी गुट हिज्बुल मुजाहिदीन कन्नै जुड़े दे न जेदे च 2 आतंकी ऐसे बी ऐन जिंदे पर 30-30 लक्ख रपे दा ईनाम ऐ। एहू तुपाई अभियान कल चिरें राती न्हैरे कारण रोकना पेआ, पर अज्ज बडुलै सवेलै गै सुरक्षाबलें ड्रोनें ते खोजी कुत्तें दा इस्तेमाल करदे होई तपाशी अभियान फी रम्भेआ तां जे तौले गै इनें आतंकवादियें गी फगड़ेआ जाई सकै।

<><><><><><>

Tourism-Boom

केंद्र नै संसद च जानकारी दिती ऐ जे जम्मू-कश्मीर च सैलानिणं दी बड़ी मती आमद होई ऐ। ब'रे 2024 च 2 करोड़ 35 लक्ख थवां मते घरेलू सैलानिणं इत्थे आए न जेड़ा अजें तगर सबबनें थवां मता ऐ। एहू आंकड़े केंद्री सैलसफा मंत्री गजेंद्र सिंह शिखावत होरें लिखित च एहू जानकारी सांसद तेजस्वी सूर्या हुंदे आसेआ पुच्छे गेदे सोआलै दे परते च दिती। 2020 च 25 लक्ख 19 ज्हार सैलानी आए ते 2024 च 2 करोड़ 35 लक्ख बाहरले मुल्खें थवां औने आहले सैलानिणं दी आमद च बी बाद्दा होआ। 2020 च 5 ज्हार 317 सैलानी आए हे ते 2024 च 65 ज्हार 452 सैलानी आए।

<><><><><><>